


# CELEBRACIÓN EN OS COTOS (na casa)

17 – 18 de outubro do 2020

## XXIX DO TEMPO ORDINARIO



NON MÁIS  
VIOLENCIA  
DE XÉNERO



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INJUSTIZA E ABANDONO,  
COS REFUXIADOS E MARXINADOS DA SOCIEDADE,  
COA NATUREZA MALTRATADA  
E CON RESPONSABILIDADE PERSOAL ANTE A COVID-19



1

## 1.- ENCONTRO EN FAMILIA

### SAÚDO DE BENVIDA

🎵 *Que ledos hoxe estamos*

#### *Celebrante:*

Benvidos sexamos todos a esta celebración. Reunímonos para compartir a fe en familia, e facémolo no nome do Pai e do Fillo e do Espírito Santo.

Estamos aquí convidados, e o Señor espera que o fagamos non para quedar ben, nin por rutina. Estamos porque queremos encher de feitos a nosa fe.

Na carta de Paulo, que logo imos ler, é felicitada unha comunidade, unha parroquia, á que se lle agradece todo o que está facendo, e todo polo que se está esforzando no coidar e coidarse.

Tamén por iso mesmo a nosa celebración de hoxe nace do agradecemento por todo o que somos capaces de facer aquí nos Cotos.

No evanxeo unha frase que nos sona moito “dade ao Cesar o que é do Cesar e a Deus o que é de Deus”. Unha frase que necesita ser berrada en alto ante o escándalo de tantos que so lles preocupa encherse de cartos, aínda que logo o corazón se quede baleiro.

2

## ACTO PENITENCIAL E COMPROMISOS

**Celebrante:** *É momento de ser coherentes e sinceros, por iso imos pedir perdón, porque aínda nos falta bastante para ser familia e parroquia crible, porque aínda se espera moito de nós.*

*Comprometémonos e pedimos perdón:*

### **Monitor/a**

➤ **Comprometédesvos a vivir sendo coherentes nos feitos que fan evanxeo sabendo que a fe non se pode quedar en palabras baleiras?**

**SÍ, COMPROMETÉMONOS**

➤ **Comprometédesvos a vivir colaborando con todos os nosos veciños e veciñas que se esforzan por ser unha parroquia mellor?**

**SÍ, COMPROMETÉMONOS**

➤ **Comprometédesvos a vivir na sinceridade e na transparencia do que se di e se fai, sen actuar con segundas intencións?**

**SÍ, COMPROMETÉMONOS**

**Celebrante:** *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

## ORACIÓN PROPIA DO DÍA

**Celebrante:** *Presentámoslle a Deus Pai os nosos agradecementos pola familia na que compartimos. Presentámoslle tamén un rebulir indignado contra tantos que fan do diñeiro un deus por enriba das persoas.*

*(silenzo)*

Deus, Noso Pai,  
concédenos a graza de sermos, sempre,  
xenerosos contigo e cos demais,  
e fai que te sirvamos de todo corazón,  
nas palabras e nos feitos da nosa vida cotiá.  
Pedímoscho polo mesmo Xesucristo,  
sabendo que el viviu no medio de nós  
dándolle a cada cousa o valor que ten.  
El que vive e reina por sempre eternamente. Amén

## 2.- PROCLAMACIÓN DA PALABRA DE DEUS

**(sentad@s)**

**Monitor/a:** *San Paulo está orgulloso do bo facer da parroquia de Salónica. A fe non se lle quedou en palabras, os seus esforzos falan das gañas de facerse crentes e cribles.*

*Tamén nós temos moito polo que sentirnos orgullosos desta familia na que compartimos en Os Cotos. Escoitemos.*

## LECTURA DA CARTA DE SAN PAULO AOS TESALONICENSES

Paulo, Silván e mais Timoteo, á Igrexa dos tesalonicenses, en Deus Pai e no Señor Xesús Cristo: deséxanvos graza e paz.

Decote damos grazas a Deus por todos vós, facendo memoria de vós nas nosas oracións. Continuamente nos lembramos diante de Deus, noso Pai, da actividade da vosa fe, do esforzo da vosa caridade e da firmeza da vosa esperanza no noso Señor Xesús Cristo.

Ben sabemos, irmáns, benqueridos de Deus, que El vos escolleu. Porque o noso Evanxeo non quedou en palabras no voso caso senón que se volveu forza exuberante do Espírito Santo.

### Palabra do Señor

♪ **Unha xuntanza de amor**

SALMO

(en pé) Leccionario I A páx 270 Mt 22,15-21 EVANXEO

## PROCLAMACIÓN DO SANTO EVANXEO SEGUNDO MATEO

Daquela os fariseos fóronse reunir para veren o xeito de pillar a Xesús nalgún dito. E mandáronlle algúns dos seus discípulos e dos partidarios de Herodes, que lle preguntaron:

-Mestre, sabemos que es sincero: que ensinas o verdadeiro camiño de Deus e que non andas con miramentos, porque non te deixas levar polos respectos humanos. Dinos, logo, que che parece: está permitido pagarlle o tributo ao Cesar ou non?

Xesús, catando a malicia, contestoulles:

- Por que me queredes comprometer, hipócritas? Mostrádeme a moeda do tributo.

Eles presentáronlle un denario. E el preguntoulles:

- De quen é esta imaxe e de quen fala esta inscrición?

Contestáronlle:

-Do César.

Entón replicoulles:

-Pois logo dádlle ao César o que é do César e a Deus o que é de Deus.

### Palabra do Señor

(sentad@s) gardamos uns instantes de silencio para acoller a palabra no corazón



Estamos agradecidos:

- temos unha familia na que rezar xuntos. A pesares das nosas diferenzas somos capaces de xuntarnos para estar xuntos con Deus.
- temos unha parroquia con moitas cousas boas das que sentirnos orgullosos. Non seremos moitos, pero somos capaces de moito.
- temos moito que coidarnos e moito que coidar. As nosas mans, os nosos esforzos non son de balde.
- temos Os Cotos, unha parroquia que imos facendo entre todos. Unha Igrexa que quere ser viva, transparente e que non quere atarse aos cartos.



(en pé)

## PROFESIÓN DA FE

**Celebrante:** *Neste encontro familiar, comprometémonos a poñer os mellores feitos para coidar e dar froito nesta Igrexa que o Pai pon nas nosas mans. Crer e facer crible é ao que o Señor nos convida, e é o que agora rezamos:*

***Creo, Señor, pero aumenta a miña fe***

***Monitor/a***

***Credes en Deus Pai e Nai,  
que nos creou á súa imaxe enchéndonos de amor, e que  
pon nas nosas mans a familia para que nos coidemos?***

***Creo, Señor, pero aumenta a miña fe***

***Credes en Xesús,***

***que fixo evanxeo de aldea en aldea, e que nos convida a  
ser palabras e feitos que o fan crible?***

***Creo, Señor, pero aumenta a miña fe***

***Credes no Espírito Santo***

***que alenta no corazón para construír entre todos unha  
mellor humanidade?***

***Creo, Señor, pero aumenta a miña fe***

***Credes na igrexa,***

***comunidade que necesita das nosas mans, dos nosos  
traballos, dos nosos esforzos para unha terra mellor  
coidada, e así sermos Igrexa de verdade na familia?***

***Creo, Señor, pero aumenta a miña fe***



## ORACIÓN UNIVERSAL

**Celebrante:** *Oremos xuntos, con confianza naquel que nos convida unha vez máis a compartir o seu banquete.*

*Dicimos:*

**Escóitanos Señor**

**Monitor/a**

- ✓ Convidados nesta Familia, pedimos polas persoas que viven sen paz, sen xustiza, sen liberdade. Polos pobos esquecidos por seren pobres, oremos
- ✓ Convidados nesta Comunidade, pedimos por nós mesmos, e por todos os veciños e veciñas da comunidade dos Cotos, para que medremos máis no facer que no falar, oremos
- ✓ Convidados nesta Humanidade, nestes días nos que tanto escoitamos falar de crise sanitaria e económica queremos rezar polas persoas que o están pasando peor, oremos
- ✓ Convidados nestas horas de pandemia, pedimos valentía e atrevemento para darmos exemplo coidando e sendo coidadosos, oremos

**Celebrante:** *Grazas Señor por abrírnos as portas da túa casa e convidarnos ao banquete da fe. Ti que vives e reinas por sempre eternamente. Amén.*

## 3.- OS SIGNOS DA COMUÑÓN CON DEUS EN FAMILIA

### NOSO PAI

**Celebrante:** *Ao Deus que confía en nós e que nos convida ao banquete do Reino, rezámoslle dicindo:*

*NOSO PAI ...*

### SIGNO DA PAZ

**Celebrante:** *Confiemos en Deus, fagamos da vida un convite. Non nos contentemos con facer as cousas por simple obriga e cumprimento, poñámoslle corazón, e así a paz de Deus estará preto de nós e poderemos compartila con todos. Estaremos entón poñendo ás persoas por enriba do diñeiro.*

### NON COMULGAMOS

### PERO ESTAMOS EN COMUÑÓN

**Celebrante:** *Celebramos hoxe a fe, convidados por Xesús. El abre as portas a todos os que queren compartir con ilusión e cariño este banquete. Poñamos o mellor de nós e sintámonos en familia cos nosos irmáns.*

*Ditosos nós que hoxe somos convidados ao banquete do Señor compartido neste noso fogar.*

 ***O pouco que Deus nos dá***

#### 4.- AVISOS E DESPEDIDA

##### ORACIÓN FINAL

###### **Celebrante:**

Oremos: Señor, dámosche as grazas porque hoxe, como familia, podemos compartir os froitos da nosa fe. Axúdanos a medrar, esforzándonos día a día, por facer que o evanxeo non se quede só en palabras e asemellándonos a Xesús poidamos participar da súa gloria no ceo. Ti que vives e reinas con nós por sempre eternamente. Amén.

*Con Xesús queremos ser crentes que nos sabemos invitados para vivir o evanxeo*

*Con Xesús queremos ter un trato xusto e digno cos demais sen deixarnos levar pola avaricia dos cartos*

*Que a celebración que agora rematamos nos dea azos para vivir na coherencia de dar froitos para a loita contra a COVID-19, tendo coidado e sendo coidadores.*

***Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.***



**“Dade a Deus o que é de Deus”**  
*Palabras de Xesús do evanxeo de hoxe.*